

SESSION 1999

**AGRÉGATION**  
**CONCOURS EXTERNE**

Section : LETTRES CLASSIQUES

VERSION LATINE

**CORVINUS CONSEILLE AU CONSUL FLAMINIUS DE DIFFERER L'ENGAGEMENT DU LAC TRASIMENE.**

heu fatis superi certare minores !  
atque hic, egregius linguae nomenque superbum,  
Coruinus, Phoebea sedet cui casside fulua  
ostentans ales proauitae insignia pugnae,  
plenus et ipse deum, et socium terrente pauore 80  
immiscet precibus monita atque his uocibus infit :  
'Iliacas per te flammis Tarpeiaque saxa,  
per patrios, consul, muros suspensaue nostrae  
euentu pugnae natorum pignora, cedas  
oramus superis tempusque ad proelia dextrum 85  
opperiare. dabunt idem camposque diemque  
pugnandi : tantum ne dedignare secundos  
expectare deos. cum fulserit hora, cruentam  
quae stragem Libyae portet, tum signa sequentur  
nulla uulsa manu, uescique interritus ales 90  
gaudebit, nullosque uomet pia terra cruores.  
an te praestantem belli fugit, improba quantum  
hoc possit Fortuna loco ? sedet obuius hostis  
aduersa fronte, at circa nemorosa minantur  
insidias iuga, nec laeua stagnantibus undis 95  
effugium patet, et tenui stant tramite fauces.  
si certare dolis et bellum ducere cordi est,  
interea rapidis aderit Seruilius armis,  
cui par imperium et uires legionibus aequae.  
bellandum est astu. leuior laus in duce dextrae.' 100  
Talia Coruinus, primoresque addere passim  
orantum uerba, et diuisus quisque timori  
nunc superos, ne Flaminio, nunc deinde precari

Flaminium, ne caelicolis contendere perstet.  
acrius hoc accensa ducis surrexerat ira, 105  
auditoque furens socias non defore uires  
'Sicine nos' inquit 'Boiorum in bella ruentis  
spectastis, cum tanta lues uulgusque tremendum  
ingrueret, rupesque iterum Tarpeia paueret ?  
quas ego tunc animas dextra, quae corpora fudi, 110  
irata tellure sata et uix uulnere uitam  
reddentis uno ! iacuerie ingentia membra  
per campos magnisque premunt nunc ossibus arua.  
scilicet has sera ad laudes Seruilius arma  
adiungat, nisi diuiso uicisse triumpho 115  
ut nequeam et decoris contentus parte quiescam ?

SILIUS ITALICUS, *Punica*, V, 76-116